



**PARLIMEN MALAYSIA
(KAMAR KHAS)**

**UCAPAN DI BAWAH USUL BERKENAAN
PERKARA
TADBIR KERAJAAN
(*PERATURAN MESYUARAT 17 BAHARU*)**

**DEWAN RAKYAT
MESYUARAT PERTAMA
PENGGAL KELIMA
PARLIMEN KETIGA BELAS**

YB DR. ONG KIAN MING (SERDANG)

**KEMENTERIAN SUMBER ASLI
DAN ALAM SEKITAR**

13 MAC 2017 (SELASA)

USUL
PERATURAN MESYUARAT 17 BAHARU
KAMAR KHAS
DEWAN RAKYAT M1P5PAR13

TARIKH : **13 MAC 2017 (ISNIN)**

AHLI YANG BERUCAP : **YB DR. ONG KIAN MING [SERDANG]**

MENTERI YANG BERTANGGUNGJAWAB : **YB MENTERI SUMBER ASLI DAN ALAM SEKITAR**

TAJUK UCAPAN : **PEMBIAYAAN PAVILLION COP22 DAN MANFAATNYA**

Semasa Persidangan Konvensyen Kerangka Perubahan Iklim Bangsa-bangsa Bersatu (United Nations Framework Convention on Climate Change – UNFCCC) yang ke-22 (22nd Conference of the Parties – COP22) pada bulan November, 2016 di Marrakech, Morocco, Malaysia telah menganjurkan ‘pavillion’ buat kali pertama.

‘Pavillion’ tersebut telah diadakan sepanjang masa COP 22 bersidang iaitu selama dua minggu dari 7 hingga 18 November, 2016.

Memandangkan kegiatan sebegini melibatkan sumber kewangan yang agak besar, saya meminta Kementerian memaklumkan:

1. Sumber-sumber pembiayaan perbelanjaan kegiatan ‘pavillion’ tersebut;

2. Manfaat-manfaat daripada kegiatan-kegiatan yang dijalankan sepanjang 'pavillion' tersebut

Saya mengambil maklum bahawa Forest City, sebuah syarikat hartanah di Iskandar Malaysia merupakan salah seorang peneraju 'pavillion'.

Memandangkan kegiatan Forest City melibatkan penambakan yang menjejaskan hutan paya bakau di Sg Pulai, di bahagian barat-daya Johor, adakah Kementerian menilai kesesuaian Forest City sebagai peneraju 'Malaysia Pavillion'.

Apakah sumbangan daripada Forest City dari segi kewangan dan adakah model pembangunan Forest City dapat meyakinkan pelawat-pelawat antarabangsa ke 'Malaysia Pavillion' bahawa negara ini melaksanakan pembangunan secara mampan dan yang bersesuaian dengan aktiviti-aktiviti yang mengurangkan pelepasan gas rumah hijau.

Sekian terima kasih.

JAWAPAN:

Tuan Yang di-Pertua,

Buat julung kalinya Malaysia telah membangunkan pavilion di persidangan COP-22. Pembangunan Pavilion Malaysia di UNFCCC COP-22 adalah menggunakan pendekatan *public-private partnership* yang melibatkan penyertaan kementerian/agensi Kerajaan, pihak swasta, badan antarabangsa dan pertubuhan bukan kerajaan. Pembangunan Pavilion Malaysia di Persidangan UNFCCC COP-22 telah diputuskan oleh Jemaah Menteri dalam mesyuaratnya pada 22 Disember 2015 supaya Malaysia membangunkan pavilion secara '*public-private partnership*' di Persidangan Ke-22 Konvensyen Rangka Kerja Perubahan Iklim Pertubuhan Bangsa-Bangsa Bersatu (UNFCCC COP-22) di Marrakesh, Morocco pada 7-18 November 2016.

Perbelanjaan bagi pembangunan pavilion ini adalah dengan menggunakan sumbangan dari pelbagai pihak. Kementerian telah menjemput pelbagai pihak untuk menyumbang serta mengambil bahagian dalam pembangunan serta aktiviti dan program di Pavilion Malaysia di Persidangan UNFCCC COP-22. Salah satu penyumbang kepada pembangunan pavilion ini adalah Country Garden Pacific View (CGPV) yang juga mengambil bahagian dalam persidangan tersebut.

Projek pembangunan Forest City yang dilaksanakan oleh CGPV adalah tertakluk kepada semua peraturan dan undang-undang seperti EIA sebagaimana projek-projek penambakan yang lain.

Pembangunan Pavilion Malaysia di persidangan COP-22 adalah untuk mempromosi agenda pertumbuhan hijau (green growth) dan pelaksanaan tindakan serta inisiatif perubahan iklim yang dilaksanakan oleh Malaysia. Fokus utama aktiviti Pavilion Malaysia adalah mengenai perhutanan, sumber tenaga boleh baharu, kecekapan tenaga, pengurusan sisa dan pembangunan Bandar rendah karbon. Beberapa kertas kerja telah dibentangkan oleh agensi-agensi yang berkaitan yang mempromosikan program-program yang telah dilaksanakan di Malaysia seperti berikut:

- (i) Green Investment Opportunities in Malaysia oleh Malaysian Investment Development Authority (MIDA);
- (ii) Overview of E-Waste Management in Malaysia from Industry Perspective oleh Shan Poornam Metals Sdn. Bhd.;
- (iii) Climate Actions from Malaysian Oil & Gas Industry Sector oleh Petroliam Nasional Bhd. (PETRONAS);
- (iv) Renewable Energy in Malaysia: Strategies and Development oleh Kementerian Tenaga, Teknologi Hijau, dan Air;
- (v) Energy Efficiency Strategies in Malaysia oleh Kementerian Tenaga, Teknologi Hijau, dan Air;
- (vi) Sustainable Cities – Malaysia’s Approach (Related to SDG 11 – Sustainable Cities and Communities) oleh Kementerian Tenaga, Teknologi Hijau, dan Air;

- (vii) Energy and Water Nexus in Malaysia oleh Kementerian Tenaga, Teknologi Hijau, dan Air;
- (viii) Climate Related Studies in Malaysian Universities oleh Kementerian Tenaga, Teknologi Hijau, dan Air;
- (ix) Malaysia's Flood Mitigation Plan oleh Jabatan Pengairan dan Saliran; dan
- (x) Forest City: A Prime Model of a Future City oleh Country Garden Pacific View.

Selain itu, Pavilion Malaysia juga turut menjadi medan bagi menguruskan pertemuan YB Menteri Sumber Asli dan Alam Sekitar dan Tenaga Australia, TYT Josh Frydenberg semasa Mesyuarat *Asia Pacific Rainforest Partnership Roundtable*. YB Menteri Sumber Asli dan Alam Sekitar juga telah mengadakan pertemuan bilateral dengan wakil Khas Perubahan Iklim United Kingdom, TYT Sir David Anthony King yang bertempat di Pavilion Malaysia. Antara perkara yang dibincangkan semasa pertemuan tersebut adalah mengenai kerjasama dalam bidang perubahan iklim, pelaksanaan *Paris Agreement* dan komitmen negara-negara maju kepada negara-negara membangun dalam perubahan iklim. Antara perjumpaan lain termasuklah bersama Driss Merroun, Minister of Urbanism Marocco.

Pembangunan Pavilion Malaysia telah memudahkan urusan YB Menteri Sumber Asli dan Alam Sekitar untuk membuat persediaan sebelum hadir di sesi *High Level Segment* untuk membuat kenyataan *National Statement* di sesi plenari persidangan. Pavilion ini juga menjadi tempat

YB Menteri mengadakan perbincangan mengenai perkara-perkara berbangkit selepas pertemuan beliau dengan TYT Sir David Anthony King dari United Kingdom serta TYT Josh Frydenberg dari Australia berhubung Asia-Pacific Rain Forest Summit. YB Menteri juga telah mengadakan sesi perbincangan dengan golongan belia yang diwakili oleh *Malaysian Youth Delegation* (MYD) di Pavilion Malaysia.

Dalam masa yang sama YB Menteri Sumber Asli dan Alam Sekitar juga telah menerima anugerah daripada Pertubuhan Bangsa-Bangsa Bersatu (PBB) bagi pihak Ericsson Malaysia & Sri Lanka atas inovasi konglomerat tersebut menggunakan teknologi maklumat dan komunikasi (ICT) di dalam program penanaman pokok bakau di Malaysia.

Di peringkat pegawai tertinggi kerajaan pula, Pavilion Malaysia telah menjadi medan utama bagi beberapa sesi perbincangan dua hala. Di antara wakil negara dan pertubuhan dunia yang telah mengunjungi Pavilion Malaysia bagi membincangkan isu perubahan iklim adalah Jepun, Mexico dan Sekretariat UNFCCC. Selain itu, Pavilion Malaysia juga menjadi lokasi perbincangan kumpulan perunding (negotiators) di bawah pakatan *Like-Minded Developing Countries* (LMDC) bagi menyelaraskan pendirian kumpulan ini sebelum berhadapan dengan negara maju semasa perundingan di peringkat UNFCCC.

Pavilion Malaysia juga menjadi lokasi bagi negara menghebahkan peluang pelaburan yang ditawarkan di Malaysia serta potensi produk pelancongan yang menarik bagi para pengunjung persidangan ini. *Booth* penerangan serta petugas pavilion dari Kementerian Sumber Asli dan Alam Sekitar, Kementerian Pelancongan dan Kebudayaan Malaysia (MOTAC) serta Lembaga Pembangunan Pelaburan Malaysia (MIDA)

telah memanfaatkan pavilion ini bagi tujuan promosi kepada para pengunjung dari pelbagai negara Parti yang hadir ke persidangan ini. Antara aktiviti yang dijalankan oleh pihak MOTAC dan MIDA termasuklah sesi penerangan melalui pembentangan, pengedaran brosur dan risalah berkaitan, tayangan video dan klip promosi serta konsultasi secara *one-on-one* dengan para pengunjung yang hadir di pavilion ini.

Kemuncak aktiviti di Pavilion Malaysia ialah pelancaran *Reducing Emissions from Deforestation and Degradation dan Role of Conservation, Sustainable Management of Forests, and Enhancement of Forest Carbon Stocks in Developing Countries (REDD+) Day*. Semasa majlis ini, YB Menteri Sumber Asli dan Alam Sekitar telah menyerahkan REDD+ *Safeguards Summary Information System (REDD+ SIS)* kepada wakil UNFCCC. Penyerahan REDD+ SIS adalah susulan daripada Malaysia's *Submission on Reference Levels for REDD+ Result Based Payment under UNFCCC* yang dikemukakan semasa persidangan COP-20 di Lima, Peru pada tahun 2014. Kedua-dua dokumen ini adalah penting untuk membolehkan Negara mengakses *results-based payments* bagi program REDD+ daripada dana antarabangsa atau Negara penyumbang (donor countries).

Sekian, terima kasih.